

曾忠襄公書札

曾忠襄公書札

卷之七目錄

復吳竹莊

復楊厚菴

與嚴渭春中丞

復喻慶勳

與楊厚菴

復朱芳浦羅旋吉

復趙玉班

復許次蘇

復方子白

復毛寄雲中丞

稟官中堂

與李良臣

復毛寄雲中丞

復沈中丞

復晏彤甫

復趙玉班

復晏彤甫

復吳竹莊

復吳曉帆

復鮑春霆

與唐義渠中丞

復彭雪琴

與李良臣

復萬錦堂

復黃南坡

復吳竹莊

與彭雪琴

稟官中堂

稟曾中堂李中丞

稟官中堂曾中堂都將軍李中丞嚴中丞

稟曾中堂官中堂李中丞

稟官中堂曾中堂都將軍李中丞嚴中丞

稟曾中堂李中丞

稟曾中堂

稟李中丞

稟官中堂李中丞嚴中丞

與楊厚菴

與官中堂

復多禮堂

復江達川

復彭雪琴

復吳竹莊

與吳仲宣

與郭筠仙

復吳竹莊

與李希菴

與官中堂

復蔣芝純

復唐桂生

復趙玉班

與李少泉中丞

與官中堂

復嚴渭春中丞

復馮萃亭

與黃南坡

復鮑春霆

復官中堂

復左季高制軍

復李季荃

致左季高制軍

與駱宮保

致嚴渭春中丞

復張肥堂

復黃鶴汀

復吳仲宣

致惲次山中丞

復朱雲巖

復駱宮保

致左季高制軍

復官中堂

復趙玉班

與郭筠仙

復彭雪琴

曾忠襄公書札卷七

復吳竹莊

頃奉十二日成刻惠書讀之殊深焦灼蕪湖經老兄部署嚴密又經派隊扼守石碓施家港自足杜該逆窺伺之念惟鮑軍糧路旣斷戰事又迭不得手則危殆萬分可想而知未審日來情形何似有米喫否能竭力支持以待援師之至否何吳七營祇可迎頭扼一路恐亦未必能大戰以卻強寇於數百之外也此時惟望蔣軍回顧徽甯實爲力顧上游保全江右之要策想左帥後路攸關亦必令其速行以拯全局也家兄已派人守池州頃已調護軍二百人亦上池州矣浮景一路左帥萬不能不兼

顧貴省邊境定可放心惟祝鮑張二軍無恙則皖南之大局亦
毫不礙也弟軍孤懸金陵惟望上游能處處穩守遏賊內竄則
全局不致震動敝軍亦陰受其福矣頃與水師營官商量請其
多爲封船弟擬商峯臣率五營上南陵以厚守南陵之力而壯
其膽亦可與鮑軍遙爲聲援但不知日來南陵情形又復何如
兄若能封船二百餘隻則此舉固可行也總宜大家想爲鮑張
二軍解圍則大局之幸矣是以聞上游喫緊之信卽神魂飛越
時切杞憂尙希將上游一切情形隨時飛速詳示是所盼禱

復楊厚庵

頃接十五日還章敬悉壹是雪帥如赴上游蕪湖魯港由麾下

派營防堵感佩之至弟接家兄來信謂鮑軍初八日出隊擊灣
沚之賊未能得手勢殊岌岌囑國荃以追爲退先解鮑軍之圍
以目前情形而論自應如此辦法第敝軍病亡者已去三成病
而未愈者亦尙有三成若遽然移動賊必從而乘之恐不能救
人而反以累已且六郎橋秣陵關屯住之賊及城外各壘畱守
之賊亦尙不少其耽耽之心又何嘗一日忘我哉是以決計穩
守但請王峯臣率陞字五營雇船上駛至蕪湖時稟商雪帥與
周漢卿三營會同水師相機進剿如能破灣沚之賊則鮑張二
軍糧路疏通聲勢亦壯矣峯臣約十八九日可以成行抵烏江
時必當趨謁軍門求指示一切如雪帥業已上行或應同貴部

戈船進剿之處亦希訓示辦理舍弟病甚沈重但望其速愈爲
幸辱承垂念並以奉聞

與嚴渭春中丞

十七日肅復一書度邀鈞鑒昨接鮑春霆軍門十三日來信雖
屬平穩而糧路梗塞病勇過多終屬可慮王可陞率陞字各營
已上赴蕪湖國荃屬其與水陸會商相機進剿如能疏通灣汊
之糧路則張鮑兩軍庶免坐困之虞矣又接李良臣軍門十九
日來信城逆分股北渡經李軍連日堵剿甚形喫重子藥亦缺
乏等語國荃已分撥火藥萬觔火繩萬盤抬小鎗子六千觔以
濟其急矣惟該逆旣分股渡江弟深恐其四出竄擾卽由敝部

抽撥千人分紮西梁山裕溪口要隘與水師相爲倚護以保運糧及民船往來之路今日已撥營登舟也伏思該逆旣不能逞於敝軍其欲分竄南北兩岸上犯腹地以圖撤金陵之師早在洞鑒之內若非得勁旅以截擊之必致有滋蔓難圖之患鄙意以爲賊由南岸上趨則應與左帥合謀以蔣薌泉方伯一軍回顧徽甯攔頭截擊卽所以保障皖南屏蔽江右亦以固左軍之後路也倘賊由北岸上趨則應與唐帥合謀以李希帥部下毛成各軍分枝至廬巢等處相賊之所向攔頭迎擊卽所以保障皖北屏蔽鄂境也已將此意達之於義帥家兄管窺蠡測之見未審果有當於時事否知關垂注謹以奉聞

復喻慶勲

初四日接展惠函具悉壹是前過北岸之賊聞於二十九日竄至巢縣未審確否督轅所調之樹字五營想已赴無爲州防守矣安慶爲省垣重地城小而堅得麾下回省照料其部署必臻妥善東北兩門外之石壘想已派得力哨弁駐紮其西門外亦宜紮一二堅壘曾記余忠宣公墓頂有大觀亭故址足以俯瞰西面似宜增一小壘與各壘相爲犄角且防該逆由此路偷挖地道也麾下於安慶地勢最爲熟悉凡有益於城守之事請隨時稟商督轅以豫備不虞是所切禱

與楊厚庵

頃聞台旆已抵大勝關親率船出隊至浦口堵賊櫛風沐雨之
勞可想而知欽佩曷已弟以天雨淋漓未及趨候歉甚歉甚今
早接李良臣軍門來函云城逆偷過浦口實有一二萬人經李
軍連日堵剿甚形喫重子藥缺乏之至弟已分撥火藥萬觔火
繩萬盤及抬小鎗子六千觔以濟其急矣惟該逆旣分股北渡
倘內趨皖境則和含巢無在在空虛均爲可慮弟擬抽撥二營
紮西梁山裕溪口豫備不虞隨從水師以扼江邊之要隘則敵
軍之民船糧路可暢行矣惟千人苦於無船渡江其事似又不
宜稍緩是以磕懇麾下派撥貴部紮此之長龍舢板每營酌分
數號將此千人渡送對江之鍼魚嘴登岸庶可以期迅速明知

貴部戈船當防勦喫緊之時萬難分派無如此間自陞營開差後更無民船可雇是以仰求麾下慈航渡濟此干人以速軍行也是否可行無任盼禱之至

復朱芳浦羅旋吉

頃接初七日惠函藉悉壹是花津旣河乾水淺戰船無能爲力亦祇好聽之而已惟望穩守營壘保全金柱關要隘是所切禱賊竄巢縣李大令及釐局委員不知從何下落殊深懸念昨接制字營周崇軒來稟賊於初五日犯西梁山營壘督率各哨勇擊退斃賊頗多並奪旗幟雲梯數十件該逆於是夜退回百渡橋次日向百顯廟銅陵閘一帶而去等語西梁山雖距蕪湖金

柱關不遠然有大江之隔有水師以扼截之周崇軒率制備六哨以守石壘必不能竄至南岸尊處但以全副精神穩守金柱關營壘專防東壩之賊來犯西梁一路可毋庸慮及也敝處如有可以設法之處或者分數百人來守東梁石壘亦未可知然此間實亦籌兵不出而事恒舍弟病極危篤弟心中彌覺焦急耳

復趙玉班

初六日排遞一緘計達英覽頃奉二十三日手書敬悉壹是味翁赴黔當遠勝于子方由湘增募一番支應聞長公與寄雲中丞奏請味翁大軍來皖此著若能做到則皖中之大幸耳精

捷全軍攻蓮塘老巢已得手否龍虎關頭有三營駐紮當足以遏其奔逸也舫仙於二十過湖則日內當可抵皖其四旂哨長李本先以酒狂責革軍令森嚴無任欽服此間穩守如恒北岸上趨之賊於初五日撲西梁山石壘經周惠堂率哨勇擊退斃賊頗多並奪旂幟雲梯百數十件次日該逆遂向銅陵關一路而去接雲帥來緘弟前派分守裕溪口之張光明亦出隊小捷惟賊由銅陵關東關一帶爭渡經水師晝夜堵截終以河窄水涸處處可通勢難一律阻截則無爲廬州必已喫緊幸家兄已調張樹聲之樹字五營至無爲州防守並調蕭毛十五營堵截於廬郡之間如能迎頭而大創之則皖北幸甚甯國近有信來

鮑張兩軍尙穩守無虞惟東壩又來賊船數百號勢將水陸同犯金柱關該處僅吉左振字營二千兵力未免單薄惟囑其與水師倚護穩守營壘而已舍弟事恒病甚危篤毫未減退實爲可慮弟日在恒營照料必待其痊可始放心回營耳

復許次蘇

昨奉十一日還章其所以獎借而期望者至優且摯慙感奚如承示江北近狀所慮極爲深遠儻假大權於賢者之手條分而整理之則消患於未萌者大介福於將來者長也敝軍於二十二日派信字長勝吉後等營出濠截解糧之賊生擒九十餘名據供係忠酋之子所帶約二三萬人由太平當塗而來者金陵

城逆及畱守之援賊於十七八等日偷過九湫洲浦口意圖北
竄經李良臣軍門率各營堵禦聞揚州亦派忠義勇助之弟恐
其旁溢四出已抽撥千人分扼西梁山裕溪口石壘與水師依
護保運糧及民船往來之路二十五日賊舍李軍營盤不攻聞
已分股內竄和州境界則皖北各屬不免大震驚矣上游空虛
無一兵堵剿而李良臣派隊追剿恐不能得力此北岸可憂之
大端也昨接鮑軍門來信甯國雖形喫重尚可穩守無虞近據
探報稱忠酋調集甯國灣沚之賊悉數來此再與敝軍決戰如
不能逞卽均渡過江北云云似此情形南岸必鬆而北岸上游
又必蔓延矣倘甯郡一帶賊情鬆勁則何紹彩吳幹臣王可陞

之十一營宜從三山回渡神滕河由無爲州攔頭以擊之則廬江桐城方可不受驚恐也舍弟事恒因積勞感寒大病已旬餘矣幸得焦聽堂明經爲之醫治漸有轉機知勞垂念並附及之

復方子白

頃連展兩緘具見綢繆之策堅貞之志皆可欽可佩惜敝部已抽千人赴西梁山裕溪口駐紮勢難再爲分撥且和州地方遼濶斷非二三千兵所能住扼之使不上竄而敝軍處前後皆賊之地勢不能再出濠也閣下旣稟請督撫各憲派兵扼守想必有一番部置也然此時已緩不濟急矣奈何奈何敝軍於二十二日派信字長勝吉後等營出濠截解糧之賊生擒九十餘名

曾忠襄公書札

卷七

七

據供係忠酋之子所帶約二三萬人由太平秣陵關而來者刻下六郎橋一帶遍野皆賊探報忠酋已調集甯郡灣沚等處之賊悉數下竄仍與敵軍決戰如再不能逞卽渡過江北云似此光景上游必稍鬆勁敵處又已喫緊北岸又必更緊不易收拾矣其如之何

復毛中丞

十月二十七日肅布一緘計達尊覽頃由安慶遞來十六日賜書敬承壹是此次籌撥火藥招募勇丁不獨賤兄弟感激靡涯卽東征各軍亦拜賜無旣也前接來示囑調令弟募東士百餘人來營教習已備公牘於十月十三日排遞長沙計達冰案矣

敵軍之艱窘情形早邀洞鑒當年近歲逼之時萬眾嗷嗷饑寒
交迫而他處又無可設法故不得不仰求中丞俯賜援手已另
稟請老兄奏明飭省局每月籌撥銀二萬兩徑解金陵以濟敵
軍之急而安萬眾之心想摯愛如公必肯俯賜允諾也此間穩
守如常而分屯秣陵關六郎橋一帶之賊耽耽環伺其由浦口
竄過北岸者其頭隊聞已至巢縣家兄前調樹字營分守巢縣
東關適值雪雨連綿之時亦難趕到或者其往守無爲州城乎
聞東壩之賊又抬來礮船二百餘號民船三百餘號則金柱關
必又喫緊國荃已緘囑敵部吉左振字營與水師嚴密防守近
接鮑春霆來信甯國官軍尙能穩守前由金陵撥去之王可陞

一軍已往紮黃墓渡或可保鮑軍之糧路矣知關盡注謹以奉聞

稟官中堂

初四日郵遞稟緘未審已邀慈鑒否北岸之賊於初五日撲西梁山營壘經卑部周惠堂率哨勇擊退斃賊頗多並奪雲梯旗幟百數十件是夜該逆退至百渡橋次早向銅陵關一路而去頃接雪帥來緘國荃前派分守裕溪口石壘之張光明亦出小隊頗有擒斬惟該逆由銅陵關東關爭渡經雪帥率水師晝夜堵剿賊氣稍衰惜水涸河窄無陸師相輔路路可通等語現在家兄調張樹聲之五營守無爲州城而以蕭毛十五營堵剿於

廬郡之間如能迎頭痛勦一二次以遏其上犯之路則爲皖北之幸迭接鮑軍門來信甯國官軍尙屬平穩惟東壩拖來賊船已有六七十號至陶家橋其東岸釜山以達小丹陽皆屯有賊匪計又將水陸同犯金柱關該處陸師僅二千人未免過於單薄國荃惟囑其穩守營壘以保此要隘而已近日南北兩岸之軍務同形喫重而舍弟貞幹病已一月甚爲沈重殊令人焦灼之至耳知關慈念謹以瀆陳

與李良臣

頃接十三日兩次惠緘敬悉壹是忠酋北渡之說與敝處探報相符然得雄師以扼截之當不致續行上竄也至侍逆帶礮船

數百號已由東壩至花津一帶圖犯金柱關等處弟已派長勝兩營赴金柱關之龍山橋梅塘嘴擇要駐紮又派嘉字營守東梁山要隘均於日內成行是侍逆一股專圖敝軍之後路實無北渡之說也常勝軍已抵鎮江弟已飛緘催之尙望麾下飭所部各營力堵續渡之賊常勝軍到時即可轟擊七里九洲賊壘使該逆無所歸路可以聚而殲之實於北岸大有裨益也囑借火藥當防堵喫緊之時如可設法騰挪無不立即應命第敝軍自擊退援賊所存之軍火已屬寥寥自前撥萬觔協濟尊處又派二營分守西梁山裕溪口兩處攜帶火藥所存益屬無幾矣前在彭部堂處借用火藥萬觔昨以伊軍缺乏專緘來取弟

亦以營中實無存餘尙不能還此次有方雅命尙希見諒至家兄撥解貴營之軍火如抵大勝關一帶弟卽飭其速赴尊處以濟要需可也

復毛寄雲中丞

初六日肅佈一緘度邀鈞覽頃奉九月二十八日賜書及錄示前緘敬悉種種此次苦守力戰幸獲擊退援賊轉危爲安實賴各將士奮勇用命老兄一聞警信卽籌兵籌餉並籌濟軍火非忠義之懷關垂大局不分畛域曷克臻此私衷銘感楮墨難宣聞次翁將回本任則老兄又少一幫手矣至虬蜉撼大樹蚊蟲噬鐵牛固無損於賢者萬一也令弟之才能幹濟當可媲美元

方已另備公牘呈尊處與山東撫台請老兄早爲郵寄梓鄉爲感至於招募技藝超羣者總以百五六十人爲度令弟帶來金陵弟擬專令渠等教習拳棍叉鉞刀鎗以強湘軍技藝而令敝營各營官哨官專教渠等曉暢湘軍紀律分數及臨陣隊伍步伐止齊度渠等得此亦足以強齊營之風氣也不必別定章程亦不必添置器械其沿途經費需用若干卽請老兄向東征局兌撥銀一二千兩從弟軍口糧項下劃扣亦無不可令弟到此卽住弟營內弟與之講求戰守等事彼此切磋定有裨益所招一百六十人到此口糧每月或少則四兩五錢多則六兩爲止每人或用半名夫或用一名夫爲止夫價每月三兩此楚軍大

規模也珂鄉佳士如願照此口糧章程則來一百六十人亦可
如不願則令弟祇帶數十人來亦可弟係爲教東省以湘軍隊
伍起見兄意如以爲然則乞緘致令弟照此信辦理請兄卽據
弟稟咨會山東河南湖北安徽各省庶一路經過無阻滯盤查
之患耳此間自擊退大股援賊初八夜又派隊出西路前濠破
其先鋒賊卡斃賊數十人由是賊勢益衰無甚動靜矣據探報
及擒賊供稱忠酋大股由秣陵溧水漂陽東壩一路或回蘇州
或上竄甯國均未可知也頃接吳竹莊觀察來緘距蕪湖三十
餘里之灣沚地方到賊甚多鮑軍有前後受敵之勢並據逃賊
供稱該逆不能逞於金陵欲上竄江西又接雪帥緘云鮑軍疲

於瘟疫二十一日小挫賊由灣沚渡河紛紛上竄等語似此則
皖南又不免喫重也知系肫注並以奉聞

復沈中丞

前月十九日肅呈一緘計達鈞覽昨奉十一月十八日賜示敬
悉我公調段王諸軍分防西路如星羅棋布著著爭先敬佩無
量舍弟靈櫬已於前月二十四日挂帆上駛抵安慶時家兄擬
畱泊兼旬再回湘中卜地安厝來示猶殷殷垂詢無任哀感金
陵之賊自前月二十四日偵知舍弟之靈櫬開行出大隊排列
窺我前濠夜間復猛撲江東橋一面經湘恒營擊退自是遂不
敢復出矣敝部分防金柱關等處之吉左振字長勝嘉字四營

於前月二十七日會同水師剿侍逆大股破賊壘數座奪賊之礮船二百餘號殺斃溺斃之賊近二千人鮑軍門於二十六日勦花旗股匪亦獲大捷擒斬逾萬追六十餘里從此軍威復振環伺甯郡之賊當可徐圖掃蕩也

復晏彤甫

前月二十三日肅呈一緘計達鈞覽初四日奉十月二十九日賜書及照會領悉種切洋鎗洋藥均蒙惠解其裨益良非淺鮮惟有督率各將弁爭先殺賊以報厚德樊縣丞鐸吉弁永元此次護解數千里實屬著有勞績當遵示於擊退援賊案內彙單請獎至丁令日昌赴香港親爲購辦情實可感其開復一層已

經家兄於十月十二日具奏並請免繳捐復銀兩想奉 恩旨
俞允矣俟行知到時卽當郵寄羊城耳金陵軍事平穩敝軍分
防金柱關等處之吉左振宇長勝嘉宇四營於前月二十七日
會同水師進剿侍逆大股破賊壘數座斃賊近二千人奪賊之
礮船二百餘號焚燬之賊船尤多鮑軍門於二十六日剿花旗
股匪擒斬萬餘人追殺六十餘里尤快人意有此數捷南岸其
日有起色乎

復趙玉班

初五日排遞一緘計達英覽初六日奉冬月十八日惠書敬承
壹是舫仙帶來之四旗勇丁已分撥各營其旗長哨官現在尙

祇張有鳳章有望二員請回湖南弟已給擬保之札令其赴尊處銷差至陳玉連等現尚願在敝營効力也來示殷殷以皖垣爲念關注之深令人銘感查安慶本有護軍義從湘後左右五營李申甫又增募鈞字三營合之老兄募來之趙協戎一營兵力已厚足資防守且蕭毛兩軍與劉南雲三營已由無爲州進剿如能將運漕巢縣迅速克復則北岸於年內或可肅清惟孝逆一股竄至石碇小淮審一帶甯郡之糧路復梗家兄深以爲憂幸鮑軍有前月二十七日之大捷軍威復振季帥一軍又攻克龍游湯溪兩縣若乘勢進取亦可爲甯郡抽釜底之薪也惟國荃自季弟去世後益嘆助我之終鮮是以稟請楚北兩大帥

飭金逸亭兄來此相助昨閱逸叟與家兄之信亦欲逸亭募勇以代味根軍門來皖江防勦家兄以逸亭當新効之時未便因一人而拂隣帥之意故仍請味翁東來第味部老營多在粵西一時難以成行新募又不易成軍此可想而知耳老兄計已回府度歲高堂萬福敬頌敬頌楊唐二弁帶繳之銀一百四十兩尊處既已備文仍繳東征局則前信所云應毋庸議矣求查照爲荷瑣瀆盡忱殊抱不安尚乞諒之

復晏彤甫

十四日肅呈一緘計達鈞覽頃奉冬月十二日賜書敬悉先生荷 朝廷倚畀之隆奉督撫兼權之 命握大符於一手呼應

更靈引企鴻猷莫名慶祝前承賜解洋鎗洋藥業已分給各營
莫不奉爲至寶丁令開復一案已將行知寄交想該員於臘底
可收到頃奉鈞牘飭查十月十五日所發之件補寄一分查此
角排單係呈印帥賀緘並說敝處軍情前奉江西沈中丞行知
業已補發一分矣國荃於二十夜派馬步十五營分兩路進剿
穀里村朱門六郎橋一帶之賊幸獲全勝將偽壘十一座一律
攻破並將附近之賊村賊館一掃而空斃賊三千餘人解散新
擄之淩髮數千人國荃前以青陽不守派劉南雲三營移紮三
山以保鮑軍之糧道家兄現調朱鎮品隆率湘前等營進剿青
陽鮑軍門亦擬於日內出隊剿高嶺梅嶺等處如得一二大勝

仗疏通糧路則不致久爲賊制矣惟金寶圩苦守十年頃據吳竹莊來信已於十二月二十日被賊破入殺戮百姓極慘擄財帛糧草甚多從此鮑軍又多一路之警金陵城內又添一路之鉅糧此最堪傷之事也天不厭亂其謂之何幸北岸之蕭毛兩軍與雪帥水師攻克運漕擬卽進剿巢縣近據探報忠酋調蘇州之賊萬餘欲續竄北岸所祝蕭毛兩軍能速克巢含以遏其上趨之路而步步埽下庶免闌入腹地耳

復吳竹莊

二十五日肅佈兩緘計均達台覽頃奉二十一日手示及抄鮑劉函稿一一誦悉連日陰雨恐鮑軍不便出隊此時辦賊總以

謀定後戰如圍棋急却洵不可一著稍錯老兄擬親往高祖山
一帶察看形勢與鮑公面定機宜則更有把握並可匡其不逮
矣青陽一無所有賊必不樂久踞然我得之則可保鮑軍後路
遏逆氛上犯想雲涯兄一軍不久可到也續作四章已拜讀一
過合之前作皆各有妙緒其佳句不能盡數已寄安慶同賞矣
弟孤軍深入危險迭經而所以自持者惟堅忍二字正與來示
所勗暗相符合但望皖南早就肅清諸軍由東壩掃蕩而下共
成平吳之功則爲東南厚幸耳來春軍事如鬆勁則冀臨一敘
否則請緩來也

復吳曉帆

頃接客歲冬月二十九日惠書敬悉壹是島人犬羊之性反復無常矧兩酋簸弄阻撓乎閣下於驚濤駭浪之中經營卅月雖因人受累而一片赤心固已昭如日星矣敝軍自去臘二十一日將六郎橋穀里村朱門一帶賊壘概行埽蕩後城逆仍堅伏不動頃據探報僞護王賀王齊王合忠逆之隊約二十萬眾卽日將由九洲渡江以半竄犯儀揚半援和含等語查該逆不能逞於敝軍而紛擾南北兩岸以圖牽動金陵之師意殊狡毒已緘告北岸各軍預爲防範矣甯國之張鮑兩軍近尙平穩惟金寶圩陷後其財帛米糧盡爲賊有而金柱關蕪湖等處亦更形喫緊所祝各軍能穩守數月待士氣日振春水漲發水師能

用其力然後可痛加勦洗耳

復鮑春霆

初九日肅佈一緘計達英覽旋接惠書知雄師援勦涇縣必能滅此朝食及得吳竹翁來信麾下果於初六日大捷擒斬逾萬埽蕩一空有此聲威吾知梅嶺灣沚一帶之賊皆不寒而慄皖南肅清可爲麾下操券而俟也何忭如之惟迭據探報僞護齊等王皆注意北岸今夜九洲兩岸火光不絕該逆必由此渡江蕭毛兩軍兵力本極單薄無爲州樹字等營係新募之師亦尙未見仗亟宜添兵助勦庶可免蔓延腹地之虞因思貴軍當大捷之時賊膽已寒朱雲涯兄一軍亦可由青陽助勦如能抽

撥王峯臣兄及劉南雲兩軍由無爲州進剿以應北岸之急庶
可與蕭毛諸軍分道並進不獨屏蔽無虞並可由巢含打下使
該逆無所逞其伎倆也弟已緘致竹莊諸公請其與麾下緘商
可否祈卓奪行之是所盼禱

與唐義渠中丞

前到蘇常之賊連日由九洑洲北渡夜間尤火光燭天絡繹不
絕初二夜火光甚大據探報李部已失四壘初三夜火光更大
不知洲上李壘已全失否頃尚未探其詳也看來北岸必形喫
緊蕭毛兩軍兵力本單敵軍因分防東西梁山金柱關三山龍
山橋等處抽出營數太多都將軍又調去五營回揚州防剿金

柱關吉左振字兩營於二十四日破薛鎮賊壘是日長勝軍亦
堵勦獲勝乃初一日賊以大隊猛撲長勝營朱洪章堵勦受敵
最久勇丁頗多傷亡幸吉左振字營馳往援應大獲勝仗斃賊
以數千計然該逆以全力窺伺龍山橋金柱關該處兵力過單
弟不得不撥數營助之而此間守兵益薄勢難兼助北岸耳尙
乞閣下飭廬州及梁園駐防之師加意嚴防是爲至要

復彭雪琴

望日肅復一緘計呈鈞覽十九日奉十六夜賜書敬悉麾下親
督戈船與蕭軍攻克運漕浮橋僞壘一掃而空快慰之餘尤深
欽佩此隘旣得想巢穴可迎刃而解而西梁裕溪又蒙麾下照

顧更可無虞矣。劉南雲三營已囑其移紮三山保鮑軍糧路。侍逆在護駕墩。據划築壘。復圖逞於金柱關。弟惟飭吉振各營。隨同水師嚴密防之。昨接程鎮學啟來稟。崑太常昭之賊約於初一初三等日獻城。又得富都護來緘。謂接報稱崑太常昭四城業已克復。而蘇州府城亦於初四日克復等語。如果屬實。則東南大有轉機也。

與李良臣

初十日肅布一緘。並派從九袁堯齡趨叩軍門。面陳壹是計已早到矣。敵軍於昨夜出隊潛取六郎橋賊壘。幸一律蕩平。擒斬無數。解散百姓不少。前接程鎮學啟來稟。崑太常昭皆即日可

撥又得富都護來緘漚軍已克崑太常昭四縣蘇州府城亦於
初四日克復果爾則東南不難肅清也惟南岸避難之民屯聚
於大勝關江心洲兩岸啼饑號寒死病枕籍真令人目不忍睹
加以米價騰貴數倍民不聊生據百姓僉稱上游貿易米船因
四壩卡釐局每逢一船到卡無論米煤小菜皆加數倍估價勒
令完數倍之釐甚至卡勇登船將商民行李衣服一搶而空是
以人皆視爲畏途裹足不前米價因之陡漲於軍民皆有所損
刻下正當免米釐之時自應格外體恤苦民查四壩卡委員如
令叔大人辦理甚近情理惟有一黃姓委員分外刁難假借麾
下之雄威故縱卡勇以擾害商賈尊處若不裁撤懲辦此人則

不獨四壩卡之釐金日形減色卽上游商旅必至蕪湖而不肯下來矣此人實有礙於麾下平日恤商愛民之賢名弟與麾下共事一方不分畛域凡有所聞見不得不據實直陳以明關切之意也並請將四壩卡所用不安分之卡勇等切實整頓一番則麾下明定抽釐若干且宜頒發章程與該局利不歸於中飽銀錢皆歸尊處實用使商民樂於貿易照章完釐則商賈必源源而來釐稅必日有起色於貴營軍餉實有裨益也如蒙許照前次袁堯齡所面陳一層辦之更好倘若難允則此著請麾下速行爲荷恃愛瀆陳伏希鑒諒至軍營採辦之米向不完釐原以體恤兵勇征戰之苦見在大勝關一帶饑民滿野凡貿易米

船亦宜加恩免釐庶饑民得數十文即可購米數升以延殘喘
不致無錢食費悉行餓殍已備公牘咨呈並求俯允照辦亦麾
下之無量功德也

復萬錦堂

迭展惠函敬承壹是舍弟靈舟於去臘二十三日過潯此時計
早度漢關矣重承關注心感之至敝軍自去臘二十一日掃蕩
六郎橋穀里村朱門一帶賊壘仍穩守如常迭據探報忠酋在
蘇常糾集各大股已於初六日齊至金陵與洪逆議定派僞護
王賀王撥賊三四萬人犯鎮江僞魯王助守金陵僞六王宗窺
伺雨花臺大營僞藍天義率悍黨數萬由九洑洲渡江與僞二
曾忠襄公書札

卷七

九

殿下等上竄廬州無爲州等處忠酋則自犯儀揚等語該逆不能遲於敝軍欲分擾北岸以牽動金陵之師乃其慣技所祝北岸各軍能上下堵截方免其四出蔓延耳近接上海來信常熟昭文及福山海口均已克復又接安慶來信青陽業已收復從此鮑軍無後顧之憂糧路益穩高梅嶺灣沚一帶之賊可徐圖掃蕩矣

復黃南叟

排遞一緘計達台覽頃奉除夕前一日惠書敬承壹是陳委員募來之勇能多而且速者全賴吾叟惠撥巨款事事關垂故成此一舉感何如之幼吾兄解帳棚等件計月杪亦可到此矣承

示江皖有漕州縣宜改解本色並咨蜀委員赴宜昌以上購米如能行之於軍食大有裨益惟敝軍正在需米之時有懸釜待炊之勢前請中丞方伯由省局撥銀四萬交敵處新營黎冠湘等儘數辦米乃萬不得已之舉未審武翁能允如所請否今早得家兄來信東征局保案已奉 旨照准吾叟以道員題奏從此除真要缺卽爲開府先聲預賀預賀次山大公祖超擢南藩則籌兵籌餉均可與吾叟一氣辦理仰見 聖主知人之明亦爲吾湘軍民之幸也周文之太守攝篆常熟時能練團以屏障大江不徒以文字高人鄙人亦數通音問想長公已深知其能矣蘇常來金陵之賊連日由九洑洲渡江北岸必又更形喫緊

李少泉中丞以全力圖崑太兩城而另遣三千人援常熟縣城
松浦太空不能不調無爲州之樹字五營赴下游助勦家兄已
調韋志俊一軍與樹營換防弟軍本無紀律又屢蹶之後未可
深恃國荃前商鮑軍門或抽王可陞劉南雲兩軍以援勦北岸
聞鮑公大捷涇縣之後尙未開仗而南雲來信該逆方窺伺三
山恐不能遞過北岸所祝蕭毛兩軍能力遏凶鋒屏蔽無廬方
免深入腹地耳

復吳竹莊

元日晴和是中興景象想福祉壯猷亦必與九十春光同臻絢
爛頌何如之除夕奉手書敬承壹是前託辦米以濟金寶圩難

民所有此項價銀已面囑敝處糧臺李少山觀察撥銀二千兩便帶蕪湖交老兄查收以作買米經費少山於初四日赴安慶拜年約初五六日可抵蕪湖也頃接李少泉中丞來信常昭僞將駱國忠等獻城數日忠酋率譚蔡各黨圍撲常熟幸降將志堅又先有布置米糧甚足少泉中丞復調常勝軍五百人帶炸礮援之以保此要地爲他日進取蘇常根本也此間搜獲僞文忠酋寶在蘇州以竄踞巢含之僞對王等因官兵進剿乞賊北援忠酋擬新正親過北岸等語所祝滬軍得手使忠酋不能北渡則蕭毛兩軍方易勦辦也

與彭雪琴

十二日肅布一函計達台覽近據投誠賊供洋商接濟城內米糧數萬石是以米價頓減賊糧不匱等語弟已稟請皖楚吳各大帥分別奏咨凡洋船上下不准多帶米糧以杜接濟金陵城賊之弊未審能做到否蘇常新到之賊皆屯聚城內今夜見燕子磯上下江心火光絡繹不絕必係該逆渡過北岸深恐肅毛兵力太單現當鮑軍得手之時未審王峯臣劉南雲兩軍能抽過北岸以應急否頃已函告竹莊南雲峯臣請其與春霆軍門商酌辦理矣尙望麾下就近飭裕涇西梁山兩營嚴密防之是所感禱

稟官中堂

二十日肅呈稟函計邀慈覽頃奉十九日賜示敬悉湘恆兩營
月餉承飭臺源源籌解無任銘感去冬稟請以湘恆營欠餉通
融辦米原係萬不得已之舉冀幸中堂批准或寬以時日或俯
允萬石茲奉鈞諭及批示一切仰見鄂省供億浩繁原難籌及
欠款敢不體度支之苦而復爲無厭之求無如卑軍三萬餘人
月需食米萬餘石下游旣米貴如珠無可購辦各營復艱苦萬
分並無買米之貲深恐春杪夏初因饑而潰惟中堂軫念東南
全局體恤饑軍有加無已務求諄囑糧臺於艱難之中爲挹注
之計倘能惠撥二三萬兩於漢口買米萬石徑解金陵濟卑軍
兼旬之食則枵腹無虞感逾挾纊矣所有此間艱苦情狀昨已

委楊永杰趨赴鈴轅面陳苦況請餉實係爲買米起見非敢別
有希冀巨款也近獲奸細供稱城賊知敝軍分防南北兩岸都
將軍又調五營回揚州防勦欲大舉撲濠等語國荃惟日事訓
練昕夕嚴防前到蘇常之賊由九洑洲北渡絡繹不絕國荃已
函囑西梁山裕溪口各營加意嚴防家兄調瑞左元中兩營以
助毛竹丹一軍惟地廣兵單處處可慮所祝希帥早來則皖北
軍務更有把握耳鮑公近未開仗金柱關之吉左振字營與龍
山橋之長勝營均於二十四日大獲全勝斃賊極多將薛鎮賊
巢概行埽盪容日另具牘賈報鈞案浙江之金華湯涇龍游蘭
涇四城均經左軍克復矣

稟曾中堂李中丞

竊本司謬膺軍旅之任自去秋飽經憂患近更身體多病深懼
隕越貽羞每思呈請代奏開缺祇念卑軍無人代領不得不在
軍支持竊念臣子以人事君自用之勞固不如用人之逸卑軍
文員如彭毓橘陳湜易良虎劉連捷等爲官爲將事事可靠武
員如蕭開印羅逢元張詩日周惠堂張光明五員均已迭報提
督記名矣如李臣典朱南桂晏澧週李祥和四員亦保總兵請
題奏簡放如伍維壽羅朝雲二員已保副將儘先推補此十
二員均屬勇敢有爲謙讓不伐蓋卑軍將三萬人已簡放實
缺者僅蕭孚泗一員未免太少在各將受恩深重原不敢妄

有希冀在本司藉資鈴束不得不妄行瀆請合無仰懇逾格恩施據情會奏將本司開缺仍在軍營治事並懇請 旨遇有提督總兵副將等缺出將請開印等十一員挨次奏請 簡放則該將等戴 朝廷不次之恩蒙憲台培植之德必能臥薪嘗膽誓掃逆氛卽本司亦幸軍中鼓舞有人可以分任其勞矣

稟官中堂曾中堂都將軍李中丞嚴中丞

竊吉左振字長勝等營於新圩角一帶迭獲大勝並派吉中和字營助守金柱關龍山橋各情形業經稟報在案旋據振字營羅逢元吉左營朱南桂和字營李祥和長勝營朱洪章嘉字營武明善等稟稱該逆自迭挫之後復糾合大股以圖復逞朱洪

章親督六哨防守新圩角營卡朱南桂羅逢元李祥和各派二哨迎防梅塘嘴渣橋灣一帶以爲聲援十五夜四鼓賊以小枝排列於梅塘嘴渣家灣對岸牽制我軍而以大股由新圩角過河猛撲洋鎗極多子如密雨另有賊划數百號繞至南圩埂以抄我軍後路李祥和於十六日昧爽率兩哨馳往接應甫至新圩角而長勝營守卡各哨業已挫退賊如潮湧而來勢甚凶悍李祥和與吉左振字營各哨堵禦良久見賊眾我寡退保老營暫避其鋒連環攻隊而各營共傷哨官八員羅逢元李南桂聞警一面將老營布置以防護駕墩之賊窺伺一面函商水師彭楚漢羅進賢等出隊夾擊而自率隊伍分三路并進羅逢元由

陸公壩傍河而上朱南桂由霍林山前進中路朱寬義由霍林山後進右路李祥和率隊從南圩埂抄擊武明善帶隊策應該逆由羣廠以至梅塘縱橫二十餘里旗幟林立烟焰燭天朱南桂羅逢元李祥和朱寬義等分四路殺入奮不顧身截賊爲數段殲其悍逆數十人遂紛紛敗潰自相踐踏各營乘勢猛追尸橫遍野直至新圩角河邊將賊之浮橋折斷其未能過河者皆溺水而死是役也各營各路共計殺賊溺賊共七八千人賊之鎗礮旗幟刀鎗均委棄遍地鮮有過小河者我軍當將新修之偽壘四座剗平水師沿河繞擊斃賊無數各營收隊已日晡矣我軍陣亡者共百餘人受傷者二百餘人本司伏查該逆此次

以數萬之衆過河猛撲長勝營六哨堵剿失利勢甚危險幸朱南桂羅逢元李祥和等與水師彭楚漢羅進賢等併力擊退復獲大勝轉危爲安有此一捷此後可保無虞矣惟金柱關寶塔石壘爲濱江要隘亟宜撥營守之庶可與馬音街三汊河聲勢聯絡益增穩固是以本司調嘉字營移紮該處而令吉中嚴字營熊登武專守東梁山并由金陵抽撥吉中公字營凌有和赴西梁山助守除吉左振字和字長勝等營傷亡弁勇應由北岸糧臺照例發給養卹銀兩外所有長勝營六哨在新圩角堵剿失利旋經吉左振字和字與水師等營猛力將大股擊退復獲大勝各緣由理合馳稟憲臺俯賜察核

稟曾中堂官中堂李中丞

竊忠逆大股圍撲石澗埠營壘萬分危險亟應派兵救援以顧
毛道有銘劉臬司連捷二軍之急查金陵金柱關老營兵力本
不甚厚於無可設法之中騰出步隊七營赴上游援剿本司不
能遠離大營是以派營務處彭道毓橘督率羅朝雲劉湘南王
仕益於初八日統帶吉中慎字固字敬字步隊三營及伍維壽
帶吉中選鋒營馬隊百餘騎由陸路上行并調守西梁山馬惠
堂之吉中制字營守裕溪口張光明之吉中備字營守東梁山
熊登武之吉中嚴字營守龍山橋李祥和之吉中和字營隨同
援剿并由彭道面商統領貞中等營蕭提督酌派幾成隊伍均

由運漕進兵稟請彭部堂派撥戰船遞過黃維河小河登岸相機進援石澗埠庶可與毛道劉臬司兩軍內外夾擊冀通一隅之氣而解石澗埠之重圍其西梁山要隘本司已派記名提督蕭開印帶吉中貞字武字兩營前往接守而以原防該處凌有和之公字營移駐裕溪口石壘其東梁山要隘本司已派副將崔文田帶吉中敏字營前往接守而以金柱關口之嘉字營移紮和字營原壘除分別移行外理合稟請憲臺俯賜察核

稟官中堂曾中堂都將軍李中丞嚴中丞

竊金柱關龍山橋各營迭獲大勝并派彭道毓橘率吉中馬步共八營馳援石澗埠各情形均隨時稟報在案旋據吉左營朱

南桂振字營羅逢元長勝營朱洪章嘉字營武明善吉中和字營李祥和等稟稱自二月十六日大戰之後該逆迭受痛剗不敢復逞賊匪陶昌發等具稟乞降朱南桂等以未可深信置之不理又緝獲賊探供稱僞侍王寶已受傷回丹陽醫治各賊目有欲拚死再戰者有欲別竄他處者朱南桂亦遣之回去使諭各賊目謂官軍即日進剿不留餘孽遂與各營會商乘凶焰已衰之時爲掃盪賊巢之計十一日黎明朱南桂羅逢元帶隊由青陽山進攻伏龍橋盧家圩一路朱南桂李祥和武明善帶隊由梅塘嘴進攻三里埂黃池一路朱寬義帶步隊與水師羅進賢彭楚漢由上冊渡傍河而上進攻花津護駕墩一路該逆偵

我軍水陸並進知勢難抵禦遂退往金寶圩丹陽漂水一帶朱南桂羅逢元等率馬步尾追截殺殿後之賊約數百人將伏龍橋三里埂護駕墩花津一帶賊壘賊卡概行焚燬仍收隊回營各守汎地本司伏查侍逆挾數萬之眾由東壩拖來礮船鎗划千餘號欲奪金柱關以抄我金陵後路屢次猛撲勢甚危險吉左振字長勝等營以三千餘人分防百餘里相持數月卒能與水師各營協力堵剿使該逆迭受大創而去保全要隘轉危爲安朱南桂羅逢元等寶屬調度有方各將士亦奮勇用命除和字營業已調過北岸隨同彭道毓橘進援石澗埠外其吉左振字長勝嘉字等營仍穩守該處所有十一日掃盪三里埂一帶

賊壘賊卡及該逆退至丹陽溧水金寶圩等處情形理合馳稟
憲臺俯賜察核

稟留中堂李中丞

竊據管帶崑字營道銜補用知府黃運昌稟稱迭據髮探面稟
上年九十月間金陵城內米糧告罄百物踊貴賊頗驚怖旋有
湖北興國州蘄黃等處猾賊薙髮出城在於對江儀徵四沿溝
地方設立各色行舖轉輸糧米等項以致城內無物不有該逆
仍恃以無恐又據卑營幫辦從九彭達炤等採辦軍米至大通
鎮目擊沿江米船百餘號皆係滿載由輪船拖帶揚帆直下絡
繹不絕無人盤詰莫知所往又據副將曾傳榮由儀徵來營面

稱目擊輪船拖帶米船至四沿溝停泊即有該處奸商販運由金陵下關接濟城賊等情卑府伏查洋船買米禁令森嚴乃漢奸射利竟與洋船夥通賊匪若不嚴禁則城賊貫輸充牣愈無克復之期卑府酌擬數條伏乞察核轉稟一漢鎮九江上海焦山現在不准輪船裝運鹽米已有定例再咨明各路領事官衙門嚴禁各國輪船不准拖帶米船上下以贖賊糧而失大信如有不法奸商希圖射利或被官軍查出或被旁人告誥果係實在情形即咨領事衙門從嚴查辦一輪船拖帶上下船隻均以大通爲起止最易稽查所有米船一色祇准在華陽鎮及安慶鹽河上卡爲止不准在大通停泊免致互混作弊如米客願意

下行亦須在安省釐局掛號領票逕抵金陵大勝關釐局呈報
卸載後仍由該局給票赴安省銷號便知所運米石確在何處
銷售并非濟賊如水陸各營採辦軍米必持統領大員印文赴
局照驗註明米若干石船若干隻核與原札所開數目相符方
准放行不許包攬民船影射偷漏違者許各卡就近拏究一大
通釐局除嚴禁米船不准停泊外凡往下游民船必由該局查
明有無夾帶米糧發給下行護照後方准附輪船拖帶如有奸
商作弊裝有米糧即係濟賊許該局將船扣留并將奸商盡懲
治法以儆效尤一四沿溝各色行戶及停泊貨船甚夥請飭署
江甯府楊守會同通江分卡委員查辦如係鹽船及各色雜貨

必先查明給予上行護照方准附輪船拖帶查有米糧即係餉賊該船戶及辦米行戶均以軍法從事米糧盡數充賞一甯波船似洋非洋似漢非漢中外均所不管最易朦混作弊查該船每於揚州裏下河一帶產米之區裝載米糧附洋船上行至金陵對江卽解纜望城投止嗣後遇有此等船隻尤宜加意稽查并請責成揚州仙女鎮四明公所甯幫董事秉公送究不准通同作弊一通州所屬如皋泰興靖江地方皆瀕江面港口堰汊甚多該處居民多帶髮在賊中往來並帶引薙髮匪徒散處各路專伺賊中有無以爲權利之計表裏爲奸耳目甚眾嗣後請通飭各屬地方官嚴拏究辦置以重典庶可少止一金陵爲洪

逆老巢各僞王府僞官屬家小以及守城各匪往來游賊通計不下數十萬口縱有蓄積而兵臨城下已及一載自然不甚充足且附近各屬產米不多目下上江兩縣徧地荒蕪尤屬無糧可據所恃者江面接濟耳今長江上下有水陸官軍扼要駐守若能嚴密稽查奸商自然斂迹不敢居然濟賊除洋船不敢在武漢買米外該逆僅九洲一綫來路祇能陸運且須擄之數百里外必難接濟如此則不特援賊再來無所得食卽城賊亦當坐困不出數月定有內訌之勢將來會剿易於得手矣等情據此本司伏查洋商運米接濟金陵城賊前經稟請憲臺批准咨明總理衙門照會各國公使轉飭嚴禁在案茲據黃潤昌所

稟亦係實在情形其所擬各條是否有當伏乞憲臺訓示施行

稟曾中堂

竊卑軍去歲擊退大股援賊當蒙憲臺批准開單請獎在案旋經本司按照各營勞績酌擬請獎名數又奉憲臺批示此次兩花臺晝夜苦守四十六日始得解圍其危險固過於他處然亦不宜太優所有湘副後南後長勝等十六營每百人准保十四人愼固猛惠四營每百人准保十三人寬克仁義等八營每百人准保十二人中軍二營每百人准保十四人選鋒及順從選四營每百人准保十二人智堅敏敬公五營每百人准保十一人崑恭等八營每百人准保九人親兵馬隊營共保三十人楊

心純五營卽照所擬辦理等因奉此仰見憲臺鼓勵軍心慎重名器之至意當經本司飭各營遵照辦理旋據開單前來開有與憲臺批定之數多保數名者或多至十數名者實以上年自六月擊退僞六王宗援賊閏八月間忠酋復糾合十三僞王大舉來援意圖吞噬各營當疲病之餘猝遇非常凶饒岌岌有全軍瓦解之勢幸託憲台威福各將士奮不顧身苦守力戰至四十六晝夜之久破賊壘百數十座前後收拾賊之精銳三四萬人出死入生保全危局實與尋常勞績較異其分防金柱關龍山橋各營去冬今春屢瀕危險經吉左振宇營竭力支持以少勝眾亦應從優獎敘以示鼓勵且各營擬保員弁皆係再三斟

酌或搶救地道身受重傷或破壘焚巢手刃賊目實在著有奇功不得不呈請獎敘本司復加查核不獨毫無冒濫尙有應行請獎因限於人數未便開入是以照各營核減人數彙開清摺伏乞憲臺俯准分別奏咨實爲恩便再卑軍當萬分喫緊之時如北岸糧臺及釐局各員或籌濟軍餉子藥以安眾或親解金陵營中不避危險皆屬著有勞績謹擇尤附摺請獎以昭激勸至各營節次陣亡員弁一併彙開清摺仰懇憲臺奏請 賜卹以慰忠魂

稟李中丞

竊本司才智淺絀謬領一軍去秋援賊來犯當萬分危險之時

除犒賞援兵錢米外每次懸重賞鼓勵敢死之士或搶救倒口或暗截地道或搶修濠壘或夜破卡壘皆賴重賞勇夫支持危局自閏八月至十月初間動用經費銀三萬二千餘兩均係借支本軍口糧現銀作爲犒賞以救臨時之急故今日支絀情形不可名狀查此項巨款不應作正開銷不能向糧臺提取理宜本司設法清楚彌補方不懸空勇糧項下因思本司上年二月初三日以浙江臬司寶缺蒙恩升補江蘇藩司已歷一年之久查實缺大員在軍營効力有得支本缺全俸養廉及勇號銀兩之例合無仰懇憲臺飭藩司衙門照例發給附解金陵大營俾本司得以稍資彌補懸欠借支之款可否出自憲恩伏乞批示遵行

稟官中堂李中丞嚴中丞

竊本司於三月二十八日接彭道毓橘函稱探得上竄廬江之賊約十餘萬人忠逆傳令決意由舒城六安上犯湖北等語查忠逆垂涎皖鄂早據各路探報均屬相符現在捻匪已竄至潛山青草壩一帶必與忠逆合併蔓延內地鮑軍門僅萬餘人兵力亦不甚厚亟須添兵上剿將此股速行撲滅免貽皖鄂無窮之患應請毛道有銘劉臬司連捷彭道毓橘暫緩攻下游已失之地卽日拔營由開成橋兜剿而上與鮑軍門上下夾擊以收聚殲之效如忠逆已由廬江上竄舒桐一帶所有毛道劉臬司彭道三軍亦應從廬江而上爲鮑軍之鈴護俾鮑軍得以偵賊

所向跟蹤追剿或攔頭截擊皆臨時相機辦理務將忠逆擊退勿使深入內地保全桐舒六安各境徐徐打下進攻巢縣至運漕雍家鎮等處有蕭提督慶衍防守無爲州有章副將志俊穩守當可無虞惟本司前已撥吉中制字備字兩營赴樅陽防堵因念彭道毓橘兵力尙單本司已撥參將黎冠湘帶吉字前營換防東梁山派副將謝光晉帶吉中貞字營兩哨及親兵五隊換防裕溪口而騰出副將崔文田所帶之吉敏字營總兵凌有和所帶之吉中公字營隨彭道進剿又抽撥副將楊鎮南所帶之親兵馬隊營馳赴北岸均歸彭道節制以厚兵力除分別移行外理合稟明憲臺俯賜察核

與楊厚菴

初七日戌刻由雪帥遞來毛竹丹劉南雲乞援帛書知忠逆層層包裹危險萬分金陵老營兵力本不甚厚然毛劉當危如累卵之時不得不迅速救援是以由金陵抽撥吉中愼固敬步隊三營及吉中選鋒營馬隊百餘騎卽日由陸路上行并調西梁山制字營裕溪口備字營東梁山嚴字營龍山橋和字營均歸彭盛南統帶相機進剿以厚兵力又由金陵撥吉中貞武兩新營接守西梁山而以公字營移紮裕溪口又撥吉中敏字營守東梁山而以嘉字營移紮龍山橋與長勝營聯絡防守惟彭盛南所帶各營由江甯鎮沿河而上至金柱關東梁過江至玉溪

口運漕約會蕭維則軍門亦出幾成隊由黃龍岡打進冀解一隅之圍而通毛劉二軍一線之路不知能有濟否又不知能趕及否此著本不易辦全仗麾下與雪翁礮船同來襄助乃可相濟成功伏乞大力維持訓示一切飭知貴部一二營暫爲相助不知可行否倘蒙允許則感荷舟誼無極矣

稟官中堂

頃接卑軍營務處彭道毓橘來函於十七日寅刻率吉中馬步八營會同蕭維則周萬倬陸師分兩路進攻皇圖寺黃龍岡賊壘彭部堂率數營水師與楊軍門二營水師攻東關以斷歸路三路并進賊不能支當將皇圖寺黃龍岡各賊壘攻破毛劉兩

軍亦出隊夾擊大獲全勝將環紮石澗埰之賊壘賊卡概行蕩平殺賊無算我軍步隊直追至羊虎山一帶因逐賊過遠士卒疲乏遂行收隊仍派馬隊窮追俟賊竄何處再行進剿等語查鮑軍已抵無爲州忠逆羣黨畏我軍包裹其膽先寒經此次痛創之後又慮鮑軍夾擊必向望城岡巢北而遁矣我軍若乘勢尾追將巢縣克復則北岸可一掃清耳知系鈞念合肅稟聞

復多禮堂

望前肅呈一緘計達鈞覽旋奉新正初七日賜書敬悉大軍已連破老巢欣慶無似韓范威名真足使西賊喪膽來示謂不懾服其心終不可以言撫尤爲破的之論欽服之至金陵之賊堅

伏不出而蘇杭來匪由九洑洲渡過北岸絡繹不絕前因忠逆圍攻石澗埠營壘由金陵抽撥馬步八營派營務處彭盛南觀察馳往援剿家兄亦派鮑軍赴無爲州救援十七日水陸并進幸將各賊壘一律盪平惟鮑軍初到未能痛加懲創耳現在忠逆以一股上犯廬江一股退歸巢縣而由麻斬下竄之捻匪已逼近皖西家兄派周厚齋軍門守桐城蔣芝純觀察守三河舒城石鎮軍清吉守廬州吳長慶梁美材六營守廬江以李申甫觀察鈞字五營合同成武臣一軍專剿捻匪鮑公則繞至桐廬由上擊下庶可截忠逆上犯之路免髮捻合併之虞也國荃亦派二營赴樅陽防守與安慶桐城相爲犄角至盛南與毛竹丹

劉南雲蕭維則四軍則以一軍防守運漕以三軍合爲一路由望城岡進剿巢縣此北岸布置之情形也侍逆於去冬及春屢犯金柱關等處意在斷我後路幸吉左振宇等營迭獲大勝遂向溧水丹陽遁去由石埭上竄江右之彭澤都昌一股聞尙徘徊於昌江東北湖口業已守住想饒景防軍亦必能竭力堵禦也家兄屢催江味根軍門由江右來助剿南岸若添此一軍亦大有裨益也

復江達川

昨奉十七日惠函知皖垣已部署周密至爲佩服頃接家兄來信捻匪已陷宿松至潛山并有竄青草壩者髮賊亦圍攻廬江

則安慶桐城一帶必大爲震動鮑軍如趕至廬江將忠逆擊退不使上竄是爲厚幸第恐兵未到而賊已上竄髮捻合併其燄益張則勦辦更難著手矣當捻匪初至黃廣及石澗埠尙未解圍之時弟卽以此著爲慮故迭次函呈鮑軍從上擊下保上游完善之地免髮捻合併之虞乃賊蹤狡譎旣不能大創於石澗埠鮑軍亦未追勦遂登舟矣迨各處函阻則又落賊後著也事機多變殊令人焦灼萬分耳近日賊情何似如直犯省城以鎮定持之必可無虞樅陽弟已派吉中制備兩營赴該處防守不知趕上否敝軍所領辦米之銀承設法籌撥感甚感甚

復彭雪琴

十八夜肅呈一函報北岸江浦之失計達鈞覽頃接十七夜手書敬承壹是昨接吳竹莊兄來信謂英酋欲助勦金陵不知與麾下及家兄作何計議鄙意該酋如實心効力能將九洲洲打開於軍事原有裨益第西人反復無常恐如白齊文故轍徒欲騙銀錢耳鮑軍門已允攻克東壩後再行假歸如趁此進勦金寶圩一帶當易肅清於金蕪兩處亦有裨益弟以三汊河馬音街距金柱關河口太遠調嘉字營赴寶塔石壘內駐紮與振字吉左等營聲勢聯絡至東梁山則派嚴字營熊登武防守以專責成另撥吉中公字營赴西梁山會同周惠堂穩守已於今日移營上船約二十四五日可抵該處也

復吳竹莊

頃奉十六日惠函敬承壹是昨接彭盛南來信十七日水陸分三路進攻大獲全勝已將黃龍岡皇圖寺羊處山一帶賊壘概行掃蕩立解重圍想尊處已早得捷音矣惟家兄來信謂石澗埤解圍之後鮑軍宜從東關攻銅城閘之前毛劉與盛南由西梁山五顯集攻銅城閘之背鄙意捻匪旣闖入皖西上游處處空虛尤爲可慮若鮑軍從東關進剿是驅賊上行勢將與捻逆聯成一片則剿辦更難著手爲今之計鮑軍宜從盛家橋上繞三河爲救桐城廬州之先著再徐徐由柘皋進兵以攻巢縣庶可兼顧上游而截忠逆由巢北內竄之路已將此意函商雪帥

與毛劉蕭諸君未審以爲然否貴軍艱苦之狀大約與敝處相同所祝珂鄉與北岸穩固庶泉源不致斷絕將來猶可稍爲敷衍耳

與吳仲宣

月前肅呈一緘計達英覽此間自二月以來侍逆屢撲金柱關等處勢甚危險幸水陸堵剿迭挫其鋒侍逆亦受傷退去金柱關防務稍鬆乃忠酋挾十餘萬眾圍撲石澗埧營壘水屑不通比由金陵抽撥八營派營務處彭盛南觀察統帶馳往援剿重圍甫解賊卽由廬江舒城上竄六安窺伺楚北而捻匪亦與之合併凶燄益熾幸舒桐廬六各城先已派兵守定家兄調鮑軍

以援六安而令成武臣軍門回駐灊口保上游漢黃之地蕭維則毛竹丹劉南雲彭盛南四軍則以一軍分防運漕雍家鎮等處以三軍攻取東關如果上游喫緊則調赴內地以先清肘腋之患而徐圖已失之地也惟迭獲僞文賊之狡計在分我南岸之軍以圖反噬現在金陵兵力雖單而穩守尙有把握惟國荃材輕任重方深隕越之虞乃蒙 天恩高厚補授浙江巡撫感激之餘惶悚無地已呈請少帥與督轅疏辭庶免謬竊高位之誚也

與郭筠仙

前肅寄各函諒均達覽聞太倉克復殺賊殆盡實足以大寒逆

膽近日乘勢攻克崑山則可直搗金閶矣近接皖垣來信忠酋
由廬江圍撲舒城經蔣軍擊走遂竄六安英霍而窺伺湖北苗
沛霖因僧邱北行忠酋上犯竟圍攻壽州襲陷懷遠轉瞬之門
一變至此真令我軍有應接不暇之勢現在家兄令鮑軍趕赴
六安跟踪追剿而令成武臣一軍駐紮灊口屏蔽武漢并計希
帥在黃州駐紮主持上游軍事至蕭維則毛竹丹劉南雲彭盛
南四軍分打東關銅陵間兩處如長公與希帥調赴上游則以
一軍守運漕雍家鎮等處以三軍赴內地援剿也迭獲僞文忠
酋欲分我南岸之兵力再大舉以撲金陵徽甯等語甯國守局
萬穩上竄徽祁之賊迭挫於王鈐峰劉克菴唐桂生諸軍已退

至建沿青陽等處江右當可無虞矣敝處分出之老營雖多而穩守與小戰尚有把握惟餉糈支絀倘再有數月則萬難支持前蒙中丞與老兄軫念飢軍特爲增捐之舉想此時已有成數乞源源賜解以濟急需無任盼禱

復吳竹莊

迭奉初二初五日惠函敬承壹是封疆大吏關繫國家隆替在平日之督撫尙不易爲況當多事之秋乎此國荃所以自知力小呈請疏辭非矯情亦非畏難也茲承獎飾逾恆益增惶愧髮捻圍撲六安勢甚危險未審鮑軍近日趕到能痛打一仗否長公調毛劉彭三軍赴六援勦弟已催其速行矣徽祁之間迭

獲大勝良堪欣慰惟另股已將竄入婺源樂平一帶江右與賊未審幼帥所調各軍能併力擊退否也

與李希菴

初五日排遞一緘計達台覽頃聞老兄已疏請開缺壹意勦賊使天下後世益曉然於此次出山爲一時權宜之舉非奪情貪位者所可同日語也何佩如之第未審大纛已抵何處清恙已全愈否此一瓣心香所望風翹祝者也敝部劉南雲彭盛南兩軍自會同維則軍門與水陸各營攻克東關銅陵閘等處遂進搗巢縣於二十二夜克之殺賊頗眾而和含一帶一律肅清矣弟以蕭軍爲貴部勁旅計老兄來皖之日必另有一番調遣是

以請其駐紮巢縣并分防東關西梁山等處庶可就近稟商一切卽請領軍餉子藥亦較爲便易至劉彭兩軍弟已調其進攻江浦如能克復卽可會同鮑軍與水師各營圍攻九洑洲賊壘昨閱上海來信崑山於十四克復卽可進攻蘇州趁此忠逆未回援之時蘇郡可望早克若鮑軍與厚帥能將九洑洲打開於軍事餉事均大有裨益也

與官中堂

國荃聞崑山巢縣和含均已克復適得少泉中丞函囑出隊牽制援蘇賊勢連日與各將弁密商猛攻雨花臺之法二十七夜二更派各營出濠四面環攻并派大隊截城賊來援之路各弁

勇奮不顧身攻至天明時幸將雨花臺及南門各偽壘一律盡
平殺賊殆盡查雨花臺爲南門咽喉之地向來各大帥圍攻金
陵皆以雨花臺未克不能近城今幸遠託福芑克此要隘城賊
必已膽寒惟地方太寬逼城太近守之殊不易現已抽撥西
路各營添築營壘以通老營之氣并飛調彭盛南一軍及振字
兩營回金陵防守以厚兵力劉南雲一軍已抵和州國荃囑其
隨同鮑軍進攻江浦知關盡念謹以奉聞

復蔣芝純

昨接初二日惠函敬承壹是忠酋前犯舒城經雄師擊退又與
苗捻合圍六安勢甚猖獗貴部二營能以少禦眾卒解重圍鎮

定之功實堪欽服苗逆經蒙城馬廉訪擊敗破壘二十餘座足挫凶鋒今得大軍與毛成兩公分道進剿不獨可解壽州之圍保潁郡之地卽苗練亦必聞風喪膽易於收拾也蕭軍門及彭盛南劉南雲三軍自攻克東關銅陵聞之後已囑南雲移六營紮望城岡屏蔽巢南一路蕭彭兩軍則可徑攻巢之東南如鮑軍已追賊至巢北兩面夾擊尤易得手惟據探報偽二殿下已帶賊萬餘回南岸以援蘇州又有由南岸續過江北之賊賊情詭譎異常究未知南北互易作何舉動也弟謬事戎行毫無建樹前奉巡撫之命深以力小任重不能圖報已呈請安慶與少帥代爲疏辭未審能邀 俞允否乃辱承獎飾讀之益增顏

汗耳

復唐桂生

接奉惠書備聆竄犯休歛之賊迭經雄師會合諸軍痛勦殲擒
甚多鮮有漏網快慰之至老熊當道保障一方至以爲頌江西
宜黃崇仁失陷賊氛擾及樟樹省垣戒嚴聞劉克庵方伯萬錦
堂鎮軍均率所部赴省防守鮑軍援江大約五月底方能到厚
帥奉 命督辦卽日當自安慶啟行矣皖浙大軍雲集勦辦此
股定易得手此間圍局如常穴地尙未竣工聞鄂省邊圉亦多
賊踪舒都統陣亡殊爲可惜未審近日戰事如何果能遏之不
入皖境否也

復趙玉班

節前肅布各緘計均達覽奉四月初七十六日惠書吾鄉雨多
水大穀價日昂心竊憂之所祝天速晴霽不致有饑饉之虞方
爲厚幸資滬會匪經閣下出不意以翦除之復辦團練族以善
其後所謂消患於未萌實桑梓無窮之福也何佩如之希帥病
已漸愈想可迅速東下味根軍門有仍赴嶺南之 旨究未知
其果來江皖否此閒自攻克雨花臺石城添紮營於西南一面
逼近城根該逆亦調溧水丹陽之賊至城內防守忠酋現在金
陵將北岸江浦一帶之賊均縮入城內意圖猛撲雨花臺各營
並約侍逆竄擾東梁山金柱關等處弟已嚴密防之厚帥與鮑

軍門擬於日內水陸進攻九洑洲賊壘敝部劉南雲一軍隨同
進剿正直江水大漲之時或可奪此要隘也弟承乏軍旃時虞
隕越矧茲疆寄曷克當之是以專疏懇辭免速官謗辱承獎借
益增惶悚耳

與李少泉中丞

日前迭寄寸緘報九洑洲克復及忠逆欲回援蘇州之狀諒達
台覽近日據逃賊及髮探供稱忠逆因下關九洑洲爲官軍所
攻洪逆仍調忠酋十三夜回金陵並未赴蘇而僞輔王楊逆亦
帶小隊入城防守等語鮑軍門各營二十一二等日均已過江
紮幕府山一帶擬徐徐進紮孝陵衛扼句容丹陽之路第地勢

太寬兵力尙嫌單薄長公令蕭爲則軍門率所部八營暫守江浦之口以防李世忠所部重來占踞劉南雲六營守下關中洲各壘寬字營守九洲洲石壘敝軍將小南門外偽壘攻克紫數營於印子山之左右該處賊壘甚堅如能設法攻克方可進逼七寶橋一帶惟洋船二十日仍至下關安泊以小船撥貨入城實爲可恨茲備牘求尊處與各領事官約法三章倘奸商再不遵令祇好開礮轟之以洩其憤何如

與官中堂

前肅各械計達鈞覽卑部於十五早派隊攻克小南門外靠城之石壘殺賊甚多城賊兩次來撲皆擊卻之厚庵雪琴兩帥親

督戈船及李鎮朝斌太湖水師自初十早起至十三日將草鞋
夾下關一帶石壘一律攻克死賊無算奪大礮數百尊燒賊拖
罟長龍舳板以及糧草輜重各船數百隻國荃當派劉南雲一
軍守下關石壘水師仍猛攻九洑洲石壘於十五夜三更後克
復所有守壘及忠部尙未過江之賊屯聚洲上者約三萬餘人
皆聚殲於此先日國荃帶三營過江是夜見九洑洲已克遂派
營守之查九洑洲爲長江關鍵金陵賊恃爲接濟之咽喉故以
全力死守今承厚雪兩帥率水師數十營苦攻六晝夜陣亡營
官三員哨官若干員傷亡弁勇至二千餘人之多竟以力取建
此奇勦僉稱自有水師以來此次爲第一惡戰奪此要隘不僅

城賊之接濟可斷而長江數千里一律肅清水師洵莫大之功矣現與厚雪兩帥會商咨請鮑軍於近日過江紮孝陵衛或可趁此機會逼其內訌國荃亦飛調分防東關銅陵閘西梁山五營回金陵以資調遣並咨請蕭爲則軍門派兵接守上游各要隘矣知系肫注謹以奉聞

復嚴渭春中丞

十七日排遞一緘計達英覽旋奉惠書敬諭大纛巡閱邊防綢繆未雨旣念賢勞之甚益徵畫畫之周南望節麾欽服無量關中正盼援甚切之時二李又因事稽遲殊爲可慮希帥病勢頗劇東下尙無定期所祝天相吉人共戡大亂乃爲厚幸耳此聞

自攻克九洲後鮑軍已陸續過江擬步步爲營徐紫孝陵衛一帶扼句容丹陽之路惟地勢太寬兵力尙嫌單薄蕭爲則軍門所帶八營家兄令其暫駐江浦浦口兩處敵軍連日將小南門外之靠城石壘攻克卽於要隘處築營駐守知關慈念謹以奉聞

復馮萃亭

十九日肅佈一緘二十五日又復寸箋未審均達台覽否頃承專弁賜書垂注殷拳感泐無旣近日迭據探報忠逆仍留金陵僞輔王楊逆已帶小隊入城大股援賊從溧陽句容而來約十餘萬人等語計不久必有大戰弟與鮑軍惟一面戒備以防援

賊並時時驚擾城賊使之不得休息待擊退援賊之後方可如來諭所云或先翦枝葉或併攻老巢再行相機辦理耳

與黃南坡

月前肅佈各緘計達台覽弟於初三日與厚帥春霆察看鍾山一帶形勢上下雖有賊壘橫亘而鮑軍可從鍾山之後繞至孝陵衛駐紮以斷該逆來路之接濟擬調肅爲則之浦口江浦各營移至幕府山駐紮以保鮑軍之糧路惟金陵東北袤延數十里兵力尙嫌單薄已咨請家兄調洪容海啟化五營隨鮑軍駐紮未識能否抽動也援賊尙無卽到消息城賊於初四日在城內清涼山一帶亮隊不下五萬餘人忠輔各酋皆在此主持死

守不動我軍惟步步進紮漸圖合圍尊處解來大礮轟攻城垣業已月餘甚爲得力我軍晝夜攻印子山二石壘已將兼旬竟尙未動賊之扼守要路良可恨耳茲懇者敝部各營共欠米商尾價銀壹萬貳千兩實在無可設措是以札委守備陳怡昇帶領各商赴長沙省城稟請吾叟與方伯卽飭東征局於七月分應解安慶之三萬兩內照數兌撥以清前項欠款明知尊處亦應接不暇實當無可如何之時不得不瑣瑣干瀆家兄處業已咨明想無不允許也

復鮑春霆

昨趨詣柳營厚擾謝謝今日申刻回營奉三十日惠書敬承壹

是所需鐵器及木料等件已飭敝營軍械所代爲籌辦俟尊處興工之時即可全數解來麾下欲調啟化五營來金陵一層頃接家兄來信謂內應不可深恃且無換防之兵故未令其卽來弟擬卽日咨商安慶請調韋義堂五營換防清弋江藉騰出洪容海五營歸尊處調遣未審家兄果以爲然否當炎天酷暑之時貴軍移至孝陵衛駐紮其勞苦辛勤殊爲可念現在城中添賊甚多今日午刻在城內山上列隊約有四五萬人不知意欲何爲或者援賊不久欲到亦未可知所望麾下加意穩慎早夜嚴防是爲至要至於步步進紮孝陵衛本極妙之策惟今年兵勇病者亦多孝陵衛乃當東路之衝要須前拒城賊後禦援賊

又須以全副精神全副氣力照應乃不喫虧且宜緊緊團紫以自固其氣不宜占地過寬恐夏杪秋初病者更多過於單薄也葛蕘之言想高明早已見及矣弟軍現阻於印子山石壘尙不能至七寶橋弟處有警尊處不能飛來策應卽東路有警弟軍亦難過來助力據鄙見雄師進孝陵衛須俟蕭軍來紫糧路之後乃動身移紫孝陵衛似更穩慎祈麾下酌之總之以自度兵力行穩著爲要想麾下必有成算在胸也

復官中堂

初七初十肅陳戰狀計可先達鈞座頃奉賜書伏蒙以採薪之憂拳拳垂詢兼因敝部疾疫頗多允頒良劑仁者之施一何溥

博至此東軍今歲之饑困實七八年中所罕見敵部軍士較多俱在前敵撫枵腹之卒驅之縱橫礮火之中殊閔然無以對之承諭湘恒兩營月餉已飭源源接解曷勝銘感月初該逆糾合叛夷攜帶大礮及開花礮來爭下關各營意圖搶回要地初一至初六十分喫緊幸均守住不過傷亡甚多耳初七之役實斃僞佩王初九之役實斃僞梯王此連日投出賊供與髮探在城內出來所報者是以西南二面逆醖爲之大挫北路已安枕無事矣惟金陵城地甚爲寬廣我師不能合圍滿擬江皖肅清後江席各軍來此共圖掃穴聞彭湖一股尙未打動則東下尙無日期殊深焦懣耳

復左季高制軍

曰昨奉到復書敬諭壹是前書謬實誠懷荷不以爲罪殊切感
而浙事破壞至此公獨承其後遭大投艱不自任無以振其頽
靡不任人無以廣其施設人才之不易允矣而人才之出亦由
上之策勵一驥之力均也凡眾御之則僅以服鹽車伯樂御之
則可以致千里以公之才氣範圍一世竿壓眾人之心思智巧
而轉移之一出於正則治化所及猶將優於天下而曰區區閩
越弗克勝任殆撫謙之過當矣貴軍掃定嶺內以清江皖之閒
發蹤指示無戰不捷欽佩欽佩士卒貧苦加以疾疫念之惻惻
如來書所云老勇欠及一年新勇欠及八月則敝軍又有甚者

用兵十餘萬餉項無一大宗可指僅僅隨時補苴之計殊令人
牢愁無已承詢此閒戰狀今月初逆賊糾叛夷數十人携帶炸
彈大礮猛攻下關草鞋夾劉南雲之營連數日夜萬分喫緊幸
堅守不退賊眾聚撲純以火包擲之焚死無算初七日南路老
營出隊攻克印子山山頂石壘守賊僞佩王馮真林授首初九
日城賊大股來爭要隘經官軍痛剿陣斬僞梯王練榮發並礮
傷輔賊之臂及忠逆坐騎賊大敗而遁斬馘幾五千人自是該
逆踉伏不動下關不復告警矣弟現已咨調蕭爲則過江扼紮
秦淮上流可斷南路秣陵關水道惟東面關圍三十餘里必俟
江席諸軍到齊方能堵口少荃縱橫吳下斷賊咽喉閣下以爲

敕定之功當吳先而越後或者望之此軍耳

復李季荃

六月二十五日惠件至今日甫至郵遞可謂遲矣閱審聲威蕩
決先破賊於顧山旋進逼澄江滾營而入諸甚佩慰但體候因
過勞之故小有違適近想已霍然矣昨獲昌岐軍門前月中旬
來信水師賴周兩將効忠實爲可憫貴部陸軍近日剿辦當極
得手情形何如常切懸系蘇常各郡難民前因恐有奸細渡江
不准北徙當此大軍雲集蹴踏餘匪該逆亦各處裹掠聞遺民
頗受困逼吾弟前敵所駐阱中偶逸之子遺必有至者尙乞加
意撫存之是亦賢昆季惠政之大端也祝禱無已

致左季高制軍

前月奉惠緘隨卽肅覆未審已登籤室否皖北軍勢以懷遠攻
兵糧路爲賊所斷全師撤退臨淮爲之震撼幸厚雪二公部下
水師先未輕進義渠老營恃以無恐然黃開榜礮船百餘號竟
無一存者可謂岌岌矣皖南則自文橋尖山捷後敗賊竄壓下
游圍青陽擾銅陵欲取道石太旌甯作老巢聲援而青邑糧少
圍急雲巖病篤恐不能保家兄先調鮑公援臨淮續檄迎勦皖
南援賊日內方將撥隊以行雖金陵合圍之勢機局全鬆而先
其所急疾甚治標正亦不得不爾敝軍頓紮如故十二日攻克
江東橋石營及附近卡壘數座斬馘頗眾此地緊逼水西旱西

二門得而守之漸可湊泊而前月杪掃清秦淮上流之水東各
壘於地勢亦稱要扼惟地廣人單外援將至不得不先爲自守
之道耳筠仙奉 命帥粵昨約至江北浦口一晤譚次偶及前
署浙運司繆公諱梓殉難身後被誣事時座中多有三江正人
賢士無不爲之扼腕繆公死事甚烈乃言者誣其權兵株守奏
請撤銷卹典查浙江自咸豐三年以後全恃蘇皖各省爲之屏
蔽本省不練一卒羅公淡村到任後始議自募楚軍時已無及
而李定泰一軍雖調至省旋卽出援湖州其餘如徽州之米興
朝甯國之周天受蘇州之張玉良皆遲延不至是杭城實無一
兵人人皆知不獨不能戰且不能守及城陷一死臣節已盡顧

以不戰責之夫守且無兵何有於戰其理殆顯然矣以繆公之孤忠慘殉身後一卹不可得殊不足以昭公允現經浙人具呈奉旨由尊處查復筠仙已函懇老兄垂意弟亦久有所聞伏惟大君子維持風教定能澤及泉壤立賜闡揚也富陽近日戰狀何如乞示知爲幸

與駱宮保

初八日肅呈一緘計達崇覽川中籌餉治兵察吏安民諸大政我夫子經營慘淡必有非後生小子所能窺其萬一國荃極欲先睹爲快以後我夫子所辦軍事吏事餉事及奏疏各件均求飭承咨示一分藉廣見聞奉爲模楷亦夫子循循善誘之道也

此間於初九日又攻克靠印子山之石壘一座靠七寶橋之士
壘三座斃賊五千有奇並陣斬僞佩王梯王細王現已咨調蕭
爲則軍門率七營過江紮印子山東路國荃亦抽撥數營擬紮
過秣陵關小河庶可據秦淮上游漸斷東路之接濟惟城東一
面非增兵萬餘不能合圍現在江西之景鎮彭湖一帶雖已肅
清而皖南羣盜如毛江味根席硯香李申夫三軍斷難遽抵東
壩國荃擬陸續召募惜餉糈支絀異常萬竈煙虛點金乏術殊
令人四顧徬徨不知所措耳

致嚴渭春中丞

前肅寸緘計達台覽金陵之賊於土山方山上方橋上下河東

紮壘十數座以阻我進兵過河之路國荃與蕭爲則軍門會商我軍兵力雖單與其賊占先著不如拚力早爭此隘爲將來進兵省力之計十七日夜隔河用礮轟擊十八日賊於礮子中居然將壘修成分部守之我軍不得已於是夜在西岸河邊紮六壘十九日夜賊又對我壘修數壘守之二十日我軍抬小划船數十號並結竹筏是夜挑精銳先過河東岸修月圍爲立足之地黎明告成我軍與蕭軍各挑奮勇坐划船過河攻撲賊土壘三座殺賊甚多卽據而守之一面搭浮橋過隊而城賊與上下各壘之賊復蜂擁而出旗幟林立與我軍鏖戰半日鎗礮傷賊無數賊不能支又經蕭爲則率所部七營及李祥和蕭開印王

仕益等乘勢追殺賊遂大敗收隊蕭軍奪獲軍械旗幟甚多其
左路一支經彭毓楠蕭孚泗趙清河武交清等擊退所克之壘
當派爲左爲右義字等營堅守從此紮孝陵衛可以有直截之
路較當年圍城可以多省十營兵力矣自七月以來我軍部署
小河西岸不遺餘力乃賊以先發制我全力保此要隘我軍不
得不拚力相爭今竭五晝夜之力乃得過此小河所幸連戰皆
捷克壘三座足以挫兇鋒而佔地利惟各路援賊來此必速我
軍佔地愈寬兵力以愈分而愈薄極盼新募之軍迅速到齊爲
妙庶可騰出老營早紮東路孝陵衛地方斯城內接濟可期悉
斷耳知關蓋注謹以奉聞

復張肥堂

二十二日率布一緡計達英盼頃展惠書及會商次翁簽還章程八條具徵卓識宏才斟酌盡善頃已專人送安慶矣運西之鹽以庫秤過掣而以行秤發售使商人可淨得六十觔之耗鹽及吳城釐金仍歸水販完納二者誠有便於商有益於餉安慶接到簽出之條想必允從無疑矣敝處所買食鹽承飭鄧遊擊趕辦開江感甚感甚敝處自鮑軍去後忠侍二酋均赴蘇錫救援弟欲爲蘇杭稍分賊勢不得不致力於城東以斷接濟幸二十一二等日攻克上方門高橋門雙橋門方山土山一帶賊壘十餘座二十三日派蕭孚泗王仕益蕭致祥熊登武胡松江等

圍攻七甕橋石壘三座二十四夜克之賊無脫者二十五日又克中和橋賊壘一座現已分兵扼守各處並派軍進紮孝陵衛以斷該逆東路之接濟從此孝陵衛之西南無一賊座矣敝部駐防金柱關各營亦於十九日進剿小丹陽之博望大獲全勝破賊卡二座賊壘七座兩路同時得手使秣陵關之賊難以駐足比派馬隊擾之頃報賊已遁溧水矣聞鮑軍進剿水陽陰雨連綿尙未開仗大約亦容易得手快抵東壩也知關蓋注並以奉聞

復黃鶴汀

數日前泐寄寸緘諒可卽登記室初十日接奉手書並承惠新

聞紙謝謝昨聞蘇城外之寶帶橋業經攻克蘇垣廓清翹首可待中丞公平吳之勲瓊乎莫尙而交贊帷幄以成茲偉績者則關中轉饋之力居多羨賀羨賀承示關稅短絀及吳淞新壩設卡情形值此四方雲擾理財之難天下一轍而弟處枯窘之狀則尤不可以言語形容前聞孫觀察鄭別駕議及洋行各通事捐助皖餉各通事欣然樂從因而商諸閣下諒必指示辦理之法促其舉行不知已有成局否祈卽賜環章爲荷至蒙劉方伯及閣下代籌鉅款月撥四萬金敝軍養命之源所賴惟此務祈垂念涸鮒按月如數早爲撥濟庶嗷嗷數萬人不至有饑潰之虞則感激寸衷正非研墨伸紙所能狀其萬一也焦山抽釐之

事松翁昨有信來弟亦將其意達之安慶矣敝處連日靜守祇以兵少無力環攻必俟新募二萬人到然後可布置合圍大約總在十月十一月矣蘭翁長才一時無兩寄帥之請業邀 俞旨而淮鹽整理尤須蘭翁運籌聞九月初七日到皖家兄定必堅留不復作廣州之遊也龔魏兩君魏爲最樸馳尺簡以邀之弟亦別有深意子湘事當如來函辦理未敢躁也洋書承概惠贈領謝領謝如尙有他種可採者亦乞寄示爲叩

復吳仲宣

二十三日肅復寸函諒指日可登籤掌二十六日續奉手翰苗逆大股又復趨重蒙城猾賊披猖至此令人髮指昨義渠中丞

來函亦深以蒙圍未解爲憂挑鎮之捷差強人意並知陳慶雲
鎮軍已於十三日抵徐惟願速提勁旅一戰而解重圍從此星
馳電掃痛洗狼氛庶蠹茲有苗芟夷爲有日耳敝部及鮑軍疫
癘已平自攻克江東橋後進薄城闔而營鮑軍率全部赴援青
陽弟處佔地愈寬兵力轉形單薄現已檄催新募之勇迅速東
來爲進攻之計一面俟皖南盪平擬請鮑公乘勝掃蕩直下東
壩一路以斷通蘇常之路庶長圍可合也

致惲次山中丞

前日奉復一函計可先達英盼弟處自攻克江東橋後部勒各
營進薄城闔今日鏖戰奪得賽拱橋其東路之上方橋河路已

扼卽浮橋亦已結筏而成苦於無兵過河東攻勦日擊接濟入城令人焦灼萬狀且佔地愈寬兵力愈形單薄鮑軍馳援皖南將來節節掃蕩節節防守一至東壩則兵力又無多矣江席二軍祇可爲五郡遊擊之師恐難來此弟前增募陸師十餘營經費器械均荷鼎力協濟感激無地連日至東面相度地形非再增募大軍仍不足以合長圍再四思維與其老師糜餉頓兵堅城永無克復之期不若趁早廣招兵力作一鼓盪平之計大公祖洞悉機宜必能諒鄙人之苦心也現擬於九月閒派乞假回籍之候補知府吳光春副將周運斌羅景集等七員在湘寶一帶陸續募足陸勇九千人十月決意立水師十二營以記名提

督周惠堂蕭開印總兵楊西平曹仁美副將陶立忠等統之皆
弟昔年攻打吉安水師老手也擬均須於十月十一月募成軍
速來金陵與老營錯綜排列戰守均有把握方可剋期攻克維
募兵愈眾需費愈繁以及鎗礮器械子藥帳棚等項爲數尤鉅
四顧無可措辦不得不磕懇大公祖代爲擘畫設法通融乃可
以收速效夙佩閣下通籌大局但求於時事有濟卽以蓋躬獨
肩其難而未嘗略分畛域至弟處尤蒙摯愛有求必應用敢備
牘逐條瀝情奉懇萬望曲鑒惻誠俯賜允許倘積年虎穴一朝
有掃蕩之期皆出自大君子之賜也天下幸甚至鄙人之感激
豈研墨伸紙所能狀其萬一哉所有十月初旬續募陸師需領

之棚帳鎗礮務求飭局早爲備辦俾卽請領拜禱拜禱

復朱雲巖

七月底專差至青陽因賊至不能入城申夫兄令其回營嗣聞被圍水泄不通焦憂萬狀後聞江席二軍取道池州會同進剿家兄復檄調鮑軍門全部星馳赴援竊幸大軍雲集指日可以解圍矣八月三十日接七月二十九日八月十七日所頒手翰悉麾下以抱恙之軀當蟻聚之賊餉道梗塞城中食糜粥者已數日嚙亦憊甚矣且自寄書以迄今日相隔又已一月羅雀掘鼠更不待言展誦再三寸心如擣正欲裁牋具答而李都轉之捷書適至悉青陽於二十七日解圍讀之狂喜以爲孤忠所格

轉危爲安而回憶數曰前率饑疲之卒嬰城固守以待外援其堅忍強毅之力直可驚風雨而泣鬼神顏魯公之守平原不得擅美於前矣欽佩曷極弟處自十二日攻克江東橋後於二十九日奪取賽拱橋城內之賊出大隊猛撲經我軍奮力擊卻現已築壘固守所恨兵力單薄不能絕其東路之接濟現在增募萬眾爲合圍之計惟募兵愈眾需餉愈繁不知何日方可了局尊體近想復元矣

復駱宮保

月初肅泐蕪函備陳懇款諒可郵達典籤初十日續奉鈞函蜀中介滇黔秦隴之間值此四方雲擾籌勦籌防無一不仰勞肇

畫誠是邁艱投大之時所幸元老精神與中興之氣運相感應
故雖機務填委師門直以一身獨任而不覺其勞 國家之幸
亦蒼生之福也劉霞仙中丞已於中秋前起節先解漢圍前赴
秦中師門以人事君功在社稷真天下之所仰望也國荃謬附
門牆治軍無狀株守一隅殊少勝算蒙師門俯鑒愚忱許照浙
捐之例推廣辦理仰見垂愛殷肫於無可籌畫之中曲爲籌畫
荃八月所添二萬人十月可以到齊合圍惟願早沾河潤俾免
饑潰之虞感戴恩師其曷有既遙想我師門造福真無量矣浙
江之富陽江南之江陰蘇城之寶帶橋節次克復頃聞有杭州
克復之說季高先生用軍神速諒亦可剋日掃蕩今乃歎師門

鑒賞於十餘年之前果期效於崇朝東南實戴大德矣

致左季高制軍

日前佈復一函祇賀捷喜諒可郵達典籤昨接上海來信有杭城克復之說而未明言其期聞之不禁躊躇起舞自大軍攻撥富春已有高屋建瓴之勢省垣踞逆早爲膽落數日之間節旄西指遽拔堅城何其成算如此之神速耶佩服佩服從此移得勝之師直下嘉湖如破竹然數節之後無復著手處矣扑舞奚如蘇城外之寶帶橋業經得手蘇州定可卽日克復惟諸君子平吳平越大功次第告成而弟株守一隅了無勝算自顧彌增慙悚前因兵力不敷合圍陸續委員回湘增募二萬人十月十

一月可以到齊而增一兵則多一兵之費嗷嗷數萬人必先保其不饑潰而後可以謀進取日夜焦思不知所措竊計麾下總轄閩浙必有可以曲賜通融之處哺我饑軍十年以來均蒙摯愛此次諒必拯我於急難之中維持於困苦之際在我公分千里之河潤挹彼注茲而敝軍得之可以萬象同春人人執戈思奮他日幸隨鞭橙尙能圖報以銘感激之忱耳

復官中堂

初四日肅呈一函計達崇覽昨奉六月二十五日賜書敬承壹是洋人濟賊之事經家兄與少荃中丞咨明總理衙門並照會各國領事以後輪船由金陵經過不准停泊如再違禁令亦祇

好照尊諭辦法開礮轟擊以伸我中國之法耳金陵之賊近日復用極大西瓜礮攻下關頭壘每子三十餘觔初六日已轟坍營牆數丈萬分危險羣賊皆負油簍伏壘邊躍躍欲上幸劉南雲與水師李與吾軍門極力堵住斃賊無數國荃與各將熟商賊既以西瓜大礮攻下關營壘勢必移至南路以轟我前敵各營不如乘勢猛攻印子山石壘如奪此要隘則我軍之氣勢似更固秣陵關一路之接濟亦可稍斷卽劉南雲下關旬日喫緊亦可稍爲鬆勁且自五月以迄今茲晝夜轟攻此壘總未能得初六早派振字營奮勇百餘人覓水將賊築南門外之新壘平毀是夜三更遂令蕭孚泗李臣典張詩曰趙三元王仕益蕭開

印李祥和熊登武等各率隊伍專用火蛋大刀梯子猛攻印子山石壘幸於初七早克其第一壘殲賊淨盡惟靠七寶橋二壘賊尙竭力死守尙未攻破我軍總未收隊然我已占第一堅壘多用鎗礮轟擊並可扼其糧路諒此二壘不能久踞也昨據髮探供稱僞輔王楊逆近日出城決計窺伺金柱關花津一帶以擾我後路等語荃已諄囑朱南桂朱洪章等加意嚴防矣

復趙玉班

初十日排遞一函計達英覽昨奉初七日惠書敬承壹是李毛股匪假楚回粵經老兄節節設戍以防其狼奔豕突則沿邊各郡縣皆受福無窮矣藍遊擊誤開坐銜容卽咨部更正筠翁約

弟於十一日至浦口一會十三日解纜下駛已於中秋在焦山
換輪船赴粵矣尊處所寄之書與荷汀昌期各函均卽加封遞
去金陵之賊近日無甚動靜舫仙於十二早攻克江東橋石壘
已移營駐紮以數月苦攻幸而奪此要隘於軍事大有裨益惟
青陽被圍已久岌岌難支家兄檄鮑軍赴援已拔幟上駛弟又
於東路抽撥四營紮幕府山一帶以固中關七里洲各營之後
路惟兵分力單極盼回湘之新募各營趕緊東下耳南翁米鹽
互市之議乃絕大妙文家兄亦深以爲然筠叟前在運司任內
創行西鹽意在規復引地現已設局試辦未審能暢行無滯否
也

與郭筠仙

九月二十七日排遞一函計達台覽此間於初二日派七營紮朝陽門外弟率各統帶營官登鍾山一覽形勢四顧廓然如此江山而蹂躪至此良可慨也然虜卻已在目中矣敝處新募各營已到三千人擬卽抽撥老營紮孝陵衛東北弟於初四日派馬步十餘營分三路進剿純化鎮隆都湖熟散岔鎮等處破賊壘二十餘座殺賊數千餘人奪獲穀米萬餘石軍械旗幟無數因地遠不能派兵駐守初八日仍收隊回營鮑軍進攻東壩尙無信來高淳已經水陸各營收復古隆賢獻廣德石埭太平旌德四城家兄已允發萬金交朱雲涯囑其將降眾遣散不知已

辦妥否從此皖南肅清可與浙師聯絡一氣矣惟敝處艱苦情形久在洞鑒益以新募一軍月需餉項共將三十萬兩糧臺有著之款不及十萬實饑寒交迫之勢昕夕徬徨焦灼萬分素蒙垂注務望與寄雲制軍籌商設法協濟則感荷無既矣眉生原擬促其赴粵以答雅意昨由安慶來云何小宋嘖有煩言謂眉生往粵必喉烏臺彈之既見忌如此恐反爲賢者之累是以眉生決計入山不作嶺南之行亦不在泰州辦事惟有養晦爲宜實可憐也南叟於初七日抵金陵在營中小住二日約十二日卽赴泰州再坐輪船赴滬也

復彭雪琴

迭奉十四十五日手書敬承壹是此次收復各城派陞字湘祥等營與水師嚴密防守壁畫精詳莫名欽佩承囑移金柱關朱軍進紮秣陵溧水適中之地以爲陞字營聲援自是要著第金柱關爲敝軍後路所關雖高溧東壩均已肅清深恐該逆乘虛而入不能不防是吉左三營勢難移動此間自望日蕭信卿軍門率九營紮鍾山一帶佔地太遠若抽撥數營紮秣陵溧水適中之地一旦有大股賊至恐彼此單薄無濟於事鄙意如果係溧水有警則由敝處派行隊往援必可趕到斷不至令峯臣一軍獨喫力也高明以爲何如